

SCRIPT OF MORNING GOJRI NEWS BULLETIN 02APR 2026
1015HRS

مارنگ گوجری نیوز بولٹن 02 اپریل 2026

یوہ آکاشوانی جموں ہے ، عبدالرحمان تین خبر سُنو۔

LG DRUG MENANCE

لیفٹیننٹ گورنر منوج سنہا نے کل جموں کشمیر مانہ منشیات غا بدھتا واہ خطرہ غے خلاف صفر برداشت پالیسی اپنان غی ہدایت دتی ،وے لوک بھون جموں مانہ ایک اعلیٰ سطحی میٹنگ غی صدارت کر رہیا تھا۔ جس مانہ ڈپٹی کمشنرز ایس۔ ایس۔ پیز تے سیول پولیس انتظامیہ گا سنئیر افسران نے شرکت کی۔ لیفٹیننٹ گورنر موصوف نے منشیات غی تسکری غا ، نیٹ ورک نانہ ختم کرن واسطے ، ایک کثیر جہتی حکمت عملی ور زور دتو۔ جس مانہ ممکنہ صارفین نانہ روکن واسطے ، وسیع عوامی بیدادی مہات، علاج مشاورت تے بحالی غی سہولیات نانہ بہتر بنانو شامل ہے۔ تانجے جموں کشمیر یوٹی نانہ منشیات تیں پاک بنایو جاسکے۔ انہاں نے لوہکی سطح ور منشیات بارے خفیہ معلومات نانہ مضبوط بنان تے منشیات غا سمگلراں غے خلاف مربوط، تے سخت کاروائی غی وی ہدایت دتی۔ میٹنگ مانہ چیف سیکرٹری اٹل ڈلو ، ڈائریکٹر جنرل پولیس نلین پرہات، تے دوجا اعلیٰ افسران نے شرکت کی۔

NARCOTICS SEIZURE

منشیات غا کاروبار غے خلاف ایک اہم مہم غے دوران جموں کشمیر غی قانون نافذ کرن آلی ایجنسیاں نے پچھلہ 5 براں مانہ مجموعی طور ور 68 ہزار 62 کلو گرام منشیات ضبط کی ہیں۔ یاہ بڑی مقدار نہ صرف علاقہ مانہ سرگرم سمگلنگ نیٹ ورک گا پھیلاؤ نانہ ظاہر کرے، بلکہ کاروائیاں غی مسلسل شدت نانہ وی اُجاگر کرے۔ یاہ معلومات مرکزی وزارت سماجی انصاف۔ اختیارات غی طرفوں راجیہ سیہا مانہ ایک سوال غا جواب مانہ فراہم کی گئیں۔ جہڑو نیشنل کانفرنس غا ممبر پارلیمنٹ چوہدری محمد رمضان نے جموں کشمیر مانہ منشیات غا استعمال غا سروے تے ضبطیاں غا حوالہ سنگ چایو تھو۔

LG SKUAST-J

لیفٹیننٹ گورنر منوج سنہا نے کل ایک اعلیٰ سطحی میٹنگ غی صدارت کی۔ جس مانہ ذراعت سائنس و ٹیکنالوجی بارے شیر کشمیر یونیورسٹی یعنی سکاسٹ جموں تے بین العوامی غذائی پالیسی تحقیقی ادارہ غے بشکار حکمت عملی اشتراق ور غور کیو گیو۔ اس اشتراق غو مقصد شواہد ور مبنی پالیسی سازی نانہ مضبوط بنانو تے مرکزی زیر انتظام علاقہ مانہ پائیداد ذریعے تبدیلی نانہ فروغ دینو ہے۔ لیفٹیننٹ گورنر منوج سنہا نے آئی۔ ایف۔ پی۔ آر۔ آئی غے سنگ مجوزہ تعاون غو خیر مقدم کیو تے کہیو جے اس غی عالمی مہارت خطہ مانہ ادارا جاتی صلاحیتاں نانہ نمایاں طور ور مضبوط کرے غی۔ میٹنگ مانہ سکاسٹ جموں مانہ آئی۔ ایف۔ پی۔ آر۔ آئی غا اشتراق سنگ غذائی پالیسی اعدادو شمار یعنی ڈیٹا غی تجزیہ کاری واسطے ایک فضیلتی

مرکز غا قیام ور وی تبادلہ خیال کیو گیو۔ اس مجوزہ مرکز نانہہ ایک عالمی مرکز گا طور ور دیکھیو جارہیو ہے۔ جہیڑو لگاتار نگرانی پالیسی جائیزہ تے خاکہ ور مبنی فیصلہ سازی مانہہ مدد فراہم کرے گی۔

CM REGULARIZATION

وزیر اعلیٰ عمر عبداللہ نے حکومت غا ڈیلی ویجزز یعنی یومیہ اجرت ور کم کرن آلا ملازماں غی مستقلی غا عزم نانہہ دہراتاں واں کل قانون ساز اسمبلی نانہہ دسیو ہے جے یوہ عمل موجودہ مالی سال غے دوران مرحلہ وار شروع کیو جے غو۔ وزیر اعلیٰ نے یاه گل ایک پرائیویٹ ممبرز بل غا جواب مانہہ کہی۔ جہیڑو ایم۔ایل۔اے محمد یوسف تاریگامی نے پیش کیو تھو۔ تے جس مانہہ یومیہ اجرت آلاں غی مستقلی غو مطالبو کیو گیو تھو۔ وزیر اعلیٰ نے کہیو جے وے اس قانون سازی غا مقصد غی مخالفت نی کرتا، تاہم اس غا پیش کیا جان غا وقت ور انہاں نانہہ تحفظات ہیں۔ انہاں نے واضع کیو ہے جے مخالفت بل غا مقصد سنگ نی بلکہ اس مرحلہ ور اس غا پیش کیا جان سنگ ہے۔

CM DOC PVT PRACTICE

وزیر اعلیٰ عمر عبداللہ نے کہیو ہے جے ڈاکٹراں غی نجی پریکٹس ور پابندی لان واسطے موثر اقدامات کیا جارہیا ہیں۔ جموں کشمیر قانون ساز اسمبلی مانہہ اس معاملہ ور ایک پرائیویٹ ممبرز بل غا جواب مانہہ انہاں نے کہیو جے بل مانہہ چایا گیا معاملہ بالکل غلط نی ہیں۔ انہاں نے کہیو جے ڈاکٹراں غی نجی پریکٹس غو رُجحان جموں کشمیر مانہہ پھیل چُکو ہے۔ انہاں نے مزید کہیو جے اس ور پابندی غا احکامات وقتاً فوقتاً بکھ بکھ حکومتاں غی طرفوں جاری کیا جیں۔ تاہم ان ور عمل درآمد ہمیشہ کمزور رہیو ہے۔

NHPC PROJECTS

قومی پن بجلی کارپوریشن یعنی این۔ایچ۔پی۔سی غے زیر ملکیت پروجیکٹاں نانہہ مرکزی زیر انتظام جموں کشمیر حکومت غے حوالے کرن غے متعلق ایک اہم قرار دار اج قانون ساز اسمبلی مانہہ پیش کیا جان غا امکان ہے۔ آکاشوانی جموں غا ناما نگار غے مطابق یاه قرار دار نیشنل کانفرنس غا ایم۔ایل۔اے سجاد شاہین نے پیش کی ہے تے اس نانہہ اج گا ایوان غا کارو بار مانہہ شامل کیو گیو ہے۔ جہیڑو پرائیویٹ ممبرز قرار داراں واسطے مقررہ 2 دناں وچوں ایک دن ہے، یاه 7 قرار دار وچوں ایک ہے۔ جن غو انتخاب قرعہ اندازی غے ذریعے کیو گیو ہے، تے توقع ہے جے اج غی کاروائی غے دوران یاه کاروائی مرکز توجہ رہے گی۔

SEC PYT ELECTORAL ROLLS

جموں کشمیر غا چناؤ کمشنر شانت منو نے کل ایک میٹنگ طلب کی جس مانہہ 2026 غی پنچائیت انتخابی فہرستاں غی جاری نظر ثانی غو جائیزو لیو گیو۔ نظر ثانی گو عمل 27 مارچ 2026 نانہہ ابتدائی انتخابی فہرست غا اجرا غے سنگ شروع کیو تھو جس مانہہ نوان اندراج اخراج یا ووٹراں غی منتقلی واسطے دعویٰ تے اعتراضات طلب کیا گیا تھا۔ جناب شانت مانو نے علاقائی عملہ غی طرفوں کہہ کہہ

جاغے رابطہ مہم ور زور دتو تانجے پہلی اپریل 2026 غی آخری تاریخ توڑی
18 براں غی عمر مکمل کرن آلا تمام اہل ووٹراں نانہ پنچائیت انتخابی فہرست مانہ
شامل کیو جاسکے، دعوو تے اعتراضات جمع کروان غی آخری تاریخ 29 اپریل
2026 مقرر کی گئی ہے۔

SATISH SPORTS

کھیڈاں بارے وزیر ستیش شرما نے کل نوجواناں بارے خدمات تے کھیڈ محکمہ گا
کم کاج غو جائیزو لیو۔ جس مانہ انتظامی تے انسانی وسائل غے متعلق اہم مسائل
ور توجو دتو گئی۔ اس جائیزہ غو مقصد جموں کشمیر مانہ کھیڈاں غی ہمہ جہتی
ترقی تے نوجواناں غی شمولیت واسطے ایک حکمتی نقش راہ تیار کرنو ہے۔ وزیر
موصوف نے اہم مسائل و للکاراں ور بات کی تے کھیڈاں گا بُنیادی ٹہانچہ نانہ بہتر
بنان تے نوجواناں غی شرکت نانہ فروغ دین غا موقعان گو جائیزو لیو ہے۔
